

四庫全書

集部

欽定四庫全書

集部

御定歷代賦彙卷一百十五
六

詳校官檢討臣劉 炘

主事銜臣徐以坤覆勘

總校官編修臣王燕緒

校對官中書臣潘曾起

謄錄監生臣錢焦選

欽定四庫全書

御定歷代賦彙卷一百十五

草木

高松賦

奉竟陵王教作

齊謝朓

閱品物於幽記訪叢育於祕經巡汜林之彌望識斯松之最靈挺於巖以羣茂臨於水而宗生豈榆柳之比性指冥椿而等齡若夫修幹垂陰喬柯飛穎望肅肅而既閒即微微而方靜懷風陰而送聲當月露而留影既芊

眠於廣隰亦迢遞於孤嶺集九僊之羽儀棲五鳳之光
景固總木之為選貫山川而自永爾乃青春受謝雲物
含明江皋綠草曖然已平紛弱葉而凝照競新藻而抽
英陵翠山其如翦施懸蘿而共輕至於星迴窮紀沙鴈
相飛同雲決其無色陽光沉而減暉卷風颭之歛吸積
霰雪之嚴霏豈彫貞於歲暮不受令於霜威若乃體同
器制質兼上才夏書稱其岱畎周篇咏其徂來乃屈已
以弘用構大壯於雲臺幸為玩於君子留神心而顧懷

君王乃徙讌蘭室解佩明椒寧幽蘭於夕陰詠聳幹於
琴朝陵高丘以致思御風景而逍遙夷散冕之隆貴懷
汾陽之寂寥邈道勝於千禩蘊神理而自超夫江海之
為大實涓澮之所歸瞻衡恒之峻極不讓壤於塵微嗟
孤陋之無取幸聞道於清微理弱羽於九萬愧不能兮
奮飛

和竟陵王高松賦

齊王儉

山有喬松峻極青葱既抽榮於岱嶽亦擢穎於荆峯若

乃朔窮於紀歲亦暮止隆冰峨峨飛雪千里嗟萬有之
必衰獨貞華之無已積皓霰而爭光延微颺而響起

高松賦

梁沈約

鬱彼高松栖根得地託北園於上邸依平臺而養翠若
夫蟠株聳幹之懿含星漏月之奇經千霜而得拱仰百
仞而方枝朝吐輕煙薄霧夜宿迷鳥羈雌露雖滋而不
潤風未動而先知既捎雲於清漢亦倒影於華池輕陰
蒙密喬柯布漢葉斷禽蹤枝通猿路聽騷騷於既曉望

隱隱於將暮曖平湖而漾青綠拂繒綺而籠丹素於時
風急龍首寒浮塞天流蓬不息明月孤懸檀藥之竹可
詠鄒枚之客存焉清都之念方遠姑射之想悠然擢柔
情於蕙圃涌寶思於珠泉豈徒為善之小樂離繳之短
篇若此而已乎

高松賦

唐
謝 偃

登靈岳以遊目極千里兮周睇盡山川之重沓容雲物
之詭怪何茲松之挺茂擢脩榦於孤林映丹青而有葉

凌青霞而矯心前絕萬仞却倚千尋俯崢嶸之深谷仰
迢遞之層岑霏夕煙而曖景度神飈而流音若乃月起
陽爻歲窮陰律匝地冰厚周空霧密雪積巖而逾峻風
乘林而轉疾結晦憲之愁雲黯蒼茫之寒日於是衆草
零羣木墜千巖槁萬嶺悴獨潔固而不渝常猗猗而結
翠始見貞而表潔乃以叢而辨類夫其深山遂性委液
流津感天地之粹質稟陰陽之精純根含冰而彌固枝
負雪而更新既無懼於玄月寧有悅乎芳春含奇文而

養勁收高節而自珍恥取媿於稽子嗤受封於亡秦本
絕希於雕刻詎有憂於斧斤若乃流膏可咀嘉實可薦
香有四飛味逾九轉延促齡於度隙駐生涯於流電故
餌之者目改服之者容變紛羽翼而上騰排紫虛而高
扇起九垓而憩息周四海而顧盼信神經而最品實祕
錄而精選嗟美材之無用悲側路之嶮巖動跬步而致
阻投一足而必危傷拙目之衆毀慨名工之獨知仰徑
寸而靡及屈百尺而自卑縈白雲以舒蓋接丹桂而變

枝凝暉遠而澹景纖羅挂而輕颼窮萬祀而不異歷千
秋而不萎豈茲木之足歎亦前賢之所規何吾生之命
舛懷丹誠而莫披心炳朗而無報情蕩滌而不羈任儻
來之否泰委玄運之遭隨戰輕翮而未舉踈逸足而莫
馳實未榮而先怠寧泛駕而致疲誠責躬而咎已豈藏
瑕而掩疵恒怯進而勇退每知雄而守雌庶比茲以自
勗履貞固而不虧

澗底寒松賦

有序

唐王勃

歲八月壬子旅遊於蜀尋茅谿之澗深溪絕磴人跡罕
到爰有松焉冒霜停雪蒼然百丈雖崇柯俊穎不能踰
其岸嗚呼斯松託非其所出羣之器何以別乎蓋物殊
類而合情士因感而成興遂作賦曰

惟松之植於澗之幽盤柯跨嶮沓抵憑流寓天地兮何
日霑雨露兮幾秋見時華之屢變知俗態之多浮故其
磊落殊狀森梢峻節紫葉吟風蒼條振雪嗟英鑒之希
遇保貞容之未缺攀翠嶠而形疲指丹霄而望絕已矣

哉蓋用輕則資衆器宏則施寡信棟梁之已成非椽桷之相假徒志遠而心屈遂才高而位下斯在物而有焉余何為而悲者

寒松賦

唐
李紳

松之生也於巖之側流俗不顧匠人未識無地勢以銜容有天機而作色徒觀其貞枝肅矗直幹芊眠倚層巒則捎雲蔽景據幽澗則蓄霧藏煙穹石盤薄而埋根凡經幾載古藤聯緣而抱節莫記何年於是白露零涼風

至林野慘慄山原愁悴彼衆盡於玄黃斯獨茂於蒼翠
然後知落落高勁亭亭孤絕其為質也不易葉而改柯
其為心也甘冒霜而停雪叶幽人之雅趣明君子之奇
節若乃確乎不拔物莫與隆陰陽不能變其性雨露所
以資其豐擢影後凋一千年而作蓋流形入夢十八載
而為公不學春開之桃李秋落之梧桐亂曰負棟梁兮
時不知冒霜雪兮空自竒諒可用而不用固斯焉而取
斯

幽松賦

唐 闕名

惟天地之覆載屬日月之貞明幸雲雨之廣潤及草木
之滋榮代何材而不用材何代而不生若乃地勢卑而
路脩迴有孤山曲澗之幽松挺百尺而數其狀聳千仞
而擢其容柯榦夭矯花葉芊茸枝橫栖鶴蓋偃盤龍蹙
皮膚而文疊峴宏磊砢而谷深重伐人之所未見匠者
之所未逢抱雅操兮積年載持概節兮佇時雍梢森乎
巖之畔扶疎兮山之足稟二儀而自清居四時而常綠

其孤高也則排煙而蕩霧其貞堅也則超代而越俗偏
睹日而疏陰邃自然而孤直起喻有叔夜之材入夢表
丁君之職澗底幸左思之詠歲寒蒙孔丘之識偉哉盛
矣屬時代兮多杞梓其用無隔窺幽澗兮茂松柏梓待
構而見須松堪棟兮希擇其文理也奇絕可以雕楹架
枕其雅操也昂藏可以振雪凌霜向日貞心擢臨風足
氣揚深谷如蒙顧此地有材良王爾經過而歎曰帝德
咸亨此松挺生公輸俯仰而顧曰王道利貞大厦用成

希皇鑒之留盼感鬱鬱之餘情者也

金松賦

有序

唐

李德裕

廣陵東南有顏太師猶子舊宅其地則孔北海故臺余因晚春夕景命駕遊眺忽覩奇木植於庭除枝似檉松葉如瞿麥迫而察之則翠葉金貫燦然有光訪其名曰金松訊其所來曰得於台嶺乃就主人求得一本列於平泉今聞封植得地枝葉益茂叙其所自作此賦焉青春已暮白日將夕經顏子之陋巷訪孔子之舊宅美

珍木之在庭得嘉名於樵客曩擢本於台嶺近徙根於
簷隙其柯肅肅自比於真松其葉纖纖實侔於瞿麥風
入葉而成韻露垂柯而流液不受命於嚴霜諒同心於
寒柏含春靄而蔥蒨映夕陽而的皪疑翠尾之羣翔若
金潭之旁射雜爽籟於篁竹混晶光於瑤碧琪樹以垂
珠而擅名金松以潛頰而莫覲亦猶處子在於隱淪奇
才遺於草澤我有衡宇依山岑寂類仲長之清曠如蕭
宰之窮僻植根此地似在崖壁殊橘柚之不遷同甘棠

之可惜庶封殖於園林永愛翫而無斁

矮松賦

有序

宋

王曾

齊城西南隅矮松園自昔之間館此邦之勝槩二松對
植卑枝四出高不倍尋周且百尺輪囷偃亞觀者駭目
蓋莫知其年祀亦靡記夫本源真造化奇詭之絕品也
曾咸平中忝鄉薦登甲科蒙被寵靈踐歷清顯幾三十
載前歲秋始罷冢司出守青社下車之後省閭里訪故
舊則曩之耆耄悉淪逝童冠皆壯老邑居風物觸目遷

變惟彼珍樹依然故態竊謂是松也匪獨以後凋克固
歲寒抑由擁腫支離不為世用故能宅茲皋壤免於斤
斧向若負構厦之材竦凌雲之幹將為梁棟戕伐無餘
又安得保其天年全其生理哉感物興歎聊為賦云

惟中齊之舊國乃東夏之奧區有囿游之勝致直廕閉
之坤隅偉茂松之駢植軼衆木而特殊上輪囷以夭矯
傍翳薈而紛敷廣庭廡之可蔽高尋常之不踰枝擁闕
兮橫亘根蹙縮兮盤紆徒觀其前瞻林嶺却枕康衢宅

寶勢兮葱鬱據右地兮膏腴類蟠蟄兮神娛訝騰倚兮
虎驅將拏攫兮未奮忽伏竄兮爭趨色鬪鮮兮欲滴形
詭俗兮難圖遠而望之蔚兮若搏鵬之出滄海迫而察
之黝兮若方輿之承寶蓋蠹洞口之歸雲堆巖阿之宿
靄談揮塵兮何多被集翠兮增汰度朔吹兮颼颼含陽
暉兮晻藹吾不知其幾千歲起毫末而碩大昔去里兮
離邦攀綠條兮彷徨今剖符兮臨郡識奇樹兮青蒼怵
光景兮遄邁嘉歲寒兮益彰葉彫彫兮不改情眷眷兮

難忘異古人之歎柳協予志之恭桑信矣夫卑以自牧終然
允臧效先哲之俯僂法幽經之伏藏願跼影於澗底厭爭榮
於豫章鄙直木兮先伐懼秀林兮見傷幸高梧之垂蔭愧脩
竹之聯芳鸞乍迷於枳棘鷦每悞於榆枋媿周雅之踏地符
羲易之巽牀既交讓以屈節復善下而同方自儲精於甘實
不受命於繁霜客有系而稱曰材之良兮梓匠之攸貴生之
全兮蒙莊之所美苟入用於鉤繩寧委跡於塵滓俾其天性
而稱珍曷若存身而受祉紛異趣兮誰與歸當去彼而取此

蟠松賦

元任士林

渺堪輿之神氣孕東海之平蠻紛百昌之甲宅儼孤松
之結蟠根半蝕以秀出枝萬折而回環允神物之附靈
時矯首而盤桓瞰然鱗甲之四縱傑出頭角而噴吐霧
市暝合雲衣晝飛非鞭霆而欲駕則既雨而初歸爾則
童豎俛仰恍然劉累之馴擾風雨吟哦又似夫葉公解
衣盤礴雷電至而颺馳也噫嘻龍為物靈不離鱗甲蕩
日月撼山淵不崇朝而雨六合何其神也桎梏禹宮之

梁斲削雷澤之梭劒津之吏照水夜驚長房之竹騰波
自駕象罔求而不得雲霧集而時化又何其幻也而況
乎青髮君之盤蹠秦大夫之舂容妙蜿蜒於氣母抱不
化之神蹤龍不知其為松松不知其為龍人不承澤螻
蟻為宮龍乎松乎出家間之雷車走隴上之雨工松乎
龍乎撫亭曲以一嘯山四立而長風

十八公賦

有序

元
馮子振

長城之北又數百里馳上京東北百數十里為蹕林環

林四向皆斤磧沙嶂松低昂掩冉殆且千萬而未有數
所為古八百里黑松林者也又數十里為孤驛松一根
十八榦共挺挺植立項領撐矗勢各合抱不令參差高
下小大不齊少分媿色於其間氣岸磅礴大似老人大
父行下視蒼岡翠麓或偃或怪各端倪嚴事無敢抗行
頃年十八榦之二榦戕於撿斧其人旋斃則神物之呵
護由來久矣今十六榦巍然昂霄其二榦斧癰小小突
兀大德壬寅把莧後三日予道應昌始一再過之歎其

屈竒瓌傑有如此者無論南北萬里殆九州之表六合之外自有宇宙以來未之有也其還薊京也語方外客盧生曰吾行諸方四十年所見五大夫之魁梧礪礪何算未見十八公之真面目生其為我圖之生欣然為貌其韻度悉緣吾言如此其驛亭沙塞荒寒寥落之狀種種甚似覩其圖者便應髣髴敕勒川皋蘭下當亦慨然重太息於予之慕遠遊而廣離騷也遂為之賦曰

異哉十八公之為靈也宇宙之所未有耳目之所不經

六合之外九州攸并當聖元之億齡首大漠之涼陁社
榆祆其原垌河柳子其溝塍黑襲歆上之貂白角海東
之鷹山不春而緘木谿太古而藏冰汜朔其凝蹠林其
稱越灤京而迤靡困砂磧之硎礧居郵置之半道走革
囊之剝騰里八百而猶衰筆參差而孰騰未廩秋而絮
繒聊卒歲而錫登長日顯晶遠陰沉青面礧礧而驟耄
質扶疎而鬢髻梯壞礧而欲島塚頑丘而若陵俄超其
羣有勃其承根獨撥而無曹暈拔征而勿朋勞我行役

淒然離亭亭長漢譯而告予大夫羸汙之未曾我方倚
鞦屏營顧影伶俜歎蒼昊之惡劇呼太史而莫磨挈傭
包於甞客寄短茁於孤僧儼如對於茂樾倦相邀於癭
藤其旁薜蘿芳萸晚馨其下芍藥涼葩溽零五從粒其
魁梧七聚鬣其峻嶒柯奔揭於璇渾條森捎於翠冥挺
挺直幹槃槃大廷羌伯仲其麓壩蹇搢紳其儀刑法陽
算之加倍重累臺之九層竺域應真並錫而騰秦府叅
軍共瀛而登天地休徵風雲依乘寒不得憎暑不得仍

堅即墨之壁壘養淩煙之股肱豎剛骨而益勁植卓勲
而勿矜謝徂來之杵臼避商雒之薪蒸聘中山之醉守
屏藍邑之聲丞基厚力憑實博聲宏神道設教人謀與
能牽小景之絲蘿遠永年之茯苓擅諸方之尊宿號大
父之高曾其間彌谷彌川亦輜亦輶競橫披以攫攘率
樛蓋而開局等鉅細之成列類攀援之不勝吾乃今知
十八公之為靈也如冕修容如領振膺如杼壓機如斛
舉升如觚有稜如几有凭百泉赴於瑤池列緯懸於玉

繩建章總於門戶滄海跨於溜澠岱宗薄於鄒嶧楚望
龍蟠於曹滕班象犀而特薦羽鴻鵠而一鵬驥渥洼而電
邁鯨渤澥而波澄奠金甌於螳卮椽寶炬於螢燈百尺
其叢十圍其棚隨風雨而上下候昏曉而寢興闔浪洶
洶清颼洒洒擁鸞鳳之合抱脫牛羊之拱把登太丘之
古韻傲韋偃之名畫羞結祀之枵枌恥締姻之卑櫝陪
肩鼇之九抃御駑馬之十駕際絕壤之杓極蔭玄鄉之
坯瓦林渴鄧而西夸樹涉湘而南赭啓昧谷而深燭垂

太陰而劇詫托凌空而槎牙邈幽都而構架警曙鹿而
錯觝愕夜矜而窮掛異時文字磔裂偏傍藟苴伽黎肘
五百而單軀歐冶劒三千而一鍋夫然故摭頤戢首於
遭迴愴恍之郊揚鬢振翮於厓畧憤悵之野吾從苔身
芝頂一根百出之上駢臂枝指而一一數之夫然後知
西都十八侯位次之元功未足以當朔林十八公岑絕
之匹亞也自有開闢即有此公孩煦呱雛嬰憐黠童乳
臭餘子蜜甜若翁綠穉其髮方泓其瞳酣暉酌嵐苦霧

塞霧或積暈之淒迷或急霏之牢籠蕭散之姿崔嵬之
曾夷曠之迹逍遙之踪高逾斂而逾下進逾恬而逾忡
約癯於豐守淡於濃韜臺閣於山林晦廊廟於蒿蓬詎
尺寸之能闕而幾微之可窮閱當時之赫赫特過眼之
匆匆彼兩都冠蓋之紛紛九衢蹄轍之憧憧躡採花之
為使狎賣菜之為傭纔陽燄之幾日已浮華之一空嗟
乎魏晉以來南北相攻邊有楊隋之廢營臺有李唐之
故烽前有度遼橫海之英後有絕漠出塞之雄尊拳毒

手以為嬉長槍大劒而為功董聯矛之短諷翊賦槩之
微工不聞草盾之幕能淬毛錐之鋒哀此老於廣莫之
場作是公於大荒之東疇賞心於片言喚窳俗於爭聾
楚足音於空谷震遠派於焦桐伸九泉不曲之氣激萬
籟不搖之衷遂有勲於茲土以大庇其厥宗耿光隆隆
頌聲淪淪謏謏其巔巖巖其躬使一丘一壑之春一偏
一曲之封或膏或肪之已秋或鬱或宰之未冬皆領畧
於晏歲均膝行其下風何千古之埋壅靡片刻之笙鏞

信明時之稔待偶逋客之相逢援狸膏而一寫駭鼉鼓
之三通追去來於俛仰惜盼睐之倥傯乃陰鏤其肺肝
尚鄙憶其惺鬆庶英游之物色以髣髴其清丰於是張
璪董元畢宏闕全挾以營丘掖之龜蒙點拂郭熙鋪敷
盧鴻或魁怪松石或尖巉松峯或倜儻權奇或張皇瓌
瓏交售其伎輒虛其中如綃墨之有知捨厓公其誰從
枝不殘於霜妃之慘慄膚不撓於土伯之瘰癧蔚殊形
與異態盡睟色與天容吾不知十八公為松乎松之為

十八公乎抑亡是公而始十八公乎十八公而始亡是公乎是公茫然請問其目客曰木公曾識夢腹魂交形接而兆朕爵綰綬紆而福祿樹偶然而附會筆至此而簡牘名亘古而頌傳姓至今其芬馥昂霄十八自一根矗如三十輻而一其轂重其五而同氣兼其四而命僕衆稚莫肩庶孽焉續憫血肉之瘡痍恣斧斤之橫酷悼無知之氓隸旋不貸於鬼錄當陽突兀滿十仍六今呵護於宛欄以厚完其右族汝諧亮弼汝協穆卜如圭汝

植如弁汝束如裾汝引如席汝促汝賡汝歌汝啓汝沃
如八元八凱同立於巖廊之上如是其篤誠明允慈惠
恭肅也吾以丁亥之夏經乎房駟之躔調凡慚鄒谷之
應價下忝燕臺之延歲在庚寅身遙上國鐵幡竿睇穹
峙之神皋金浮圖仰中居之帝宅屋廬不勝其鱗次而
喧闐每訝其迴曠冠蓋不勝其肩摩而逼仄長歎其空
闊釜煙半緇化之煤炁案饌寡鮮嘗之菰核三百六旬
之梵唄爭酌竺鉢於絳帽十千一斗之罇壘競瞰樓宮

於紫陌吾詢瓌產之棟梁咸曰東林之搜索仍謂夢公
於焉琥珀一根容二九之排比傑木挺獨孤之卓特鬚
鱗相湊泊而雅號氣類願躡躋而莫克吾始聽而眉揚
驟聆而胃惑足欲舉而虛跼臂欣馳而靡翮已而齒歎
於識面之達官頤解於賞音之重客傳聲於上宰而磨
踵引手於名王而加額當時猶謂方仙紫藟可以他年
不死近在故家赤沙夢澤之南何必孤館青松自以數
日增封遠涉上界白海渾灤之北乾元彌覆十八公坤

地不知重幾畫數不我偶志與願違間一歲而壬辰驟
驛埃而決歸俄世祖之鼎成望橋山而歔歎聖天子改
明年之紀楚僖父更京師之轡大德庚子雨露兩畿連
三暑之燭毒賦桑乾之式微壬辰之秋金蓮頓稀菊有
黃花淒其紵衣遂私覲之計懇疇分攜之涕揮方是時
也商琯漸高姬紈勿御鵲鳴言旋鼪鼠相响拉還入衛
蘋婆留戍駕鵞有越境之勞蟋蟀無出疆之懼木皮韜
三寸之韞飈埃告九分之遽緣是指涼亭順霜序昕闕

掣晴嶺翫廷卮別兩駮馭樓瞻五鳳之翩翻岡聳五龍
之箕踞棕擎幄殿而軒邃檜並苑牆而容與黑山一帶
丘燐螢炷神榆一障奇鬼虺覷快悒邇而跌宕迂岑寂
親而媚好拒鴻荒而下德力難喻禹貢之外聲文聊趣
估方磬橐而更騎襍脫單持而罕屨訛話言則委性命
於古人困偵候則假隧蹊於辯豎歌呼莫非留犁壺畔
之循習卧起盡是卓歇圖中之家具休談伊吾邏逆之
寒溫奚異敕勒皋蘭之完聚人生久知老會至之期客

路恰到始欲愁之處攢數纖柳不復能樹園則盈握厖
然稚孺條如折根葩稍墜絮截長滑箭伐短怯筋犂牛
過之舐葉而駝首昂脣掀甘劇飯茹匪餽匪糧疾運猶
飫煨燹絨啄日月云屢偉哉造物鎔范陶鑄痛節所餐
料細蓄鉅道旁之厄饕餮其庶頑軀醜狀詘曲蹲踞負
戴不貲秤力乃去彼楊奚辜而此值遇荒涼僻左憐爾
根據地無荆榛山無枯朽澤有鷗鳬陂有鸚鵡來趾絕
踪介扉劬辛蓬吹礫噓目曙其眇澁徑逖響將前復跋

低舞韋裳擁氍推輪一犢一轅百車鱗鱗銜尾牽連弗
摧其輶命繫隻婦驅羝逐羗層溪遙紆淺殆沒膝急澍
晷刻暴漲尋尺撲陋遐磧舟楫罔識亂流而渡鞍影翼
翼暫免濡首裙襦盡濕平房無脊覆土代甍上雨逗漏
塊封如室其顛雞犬寢處行立青莎芊綿霖久逾碧循
檐至末繚繞無極朔飄驚砂馬腹輒埋豈但眯睫揚塵
曳柴畫黥於墨曉昏共靈酷擊虐排糠箕粒徒蒼蒼茫
茫依水戀草毳帳撒星締繪文藻獵飛射走喜壯惡老

醺醺搜攪誇美詫好巴糜混酪旋啜旋飽春和則露駁
原沍臘窘則冰收澗聲休涼則陽坡下程守凍則陰岑
止營天窗騰而頂暢顱亮地錐銳而條縻縵縈午曦斜
而東箔撤蔽朝旭警而西櫺透明綠芳謝而雲散霧失
繡馥悅而川包壤并左褰帷而下客旅進右推幕而貴
人步鏗溝濤盈而雀候蛙伺郊藪剔而獮魚貉烹蹄噉
登而駒乳迅躍蕎稔熟而雛哇狎迎骨徵骨兆而卦灼
俱驗駝人駝乘而壁懸若生至若王家戚姻主壻舅甥

貴莫與京富不可名爾媾爾嫺悉媼悉姪笄玉步搖袍
金織成衷袒服而綃蹙縮宮韉而黝呈帽妥鬟而引翠
珥充耳而垂瓔媵俛眉而擣練裂帛嬰擁髻而易棚替
衽盤飧豐而鎖指剗笋袂袒卸而襟肌褪瓊或簪烘霽
之罌粟或戴凝霜之菊英或工篝火之豔握或拙背缸
之懶情或額黃而殘照初抹或噴黛而修巒薄橫或朶
腮而柱倚曛盼或藕腕而榻敲宿醒或悲歌而鉞漬溫
枕或醉舞而袖黏湓觥琲璣輸渤海之囊琛賁發崑崙

之簾羽翎來鴈鴈之島組織出鷦鷯之城寸珠而卑千
駟之贈片琬而鼓十睂之爭厥有斷勒弊鞵貧輶敗輶
撇捩蹠蹠襪襪襪姊姑單笥埋妯娒疎簾相忘麻縷底
訐羅縠首無釵澤衣不湯沐媪承筐而草炭俛拾兒掉
鞅而竹弓能鏃徙輿薪而街鬻樵爨撈釜蕨而市煤蔬
藪雙履唱而德色紉補五漿饋而撐腸稼穀征夫遠而
疲繭糗糒寒閨嬾而凋殘脯盪烹溫於尾扇之遺粒棗
質於鞍峯之落毛鐙鳴於妖魅之憑現輞座於冥昏之

締交葦筋貫於貸線之錐札勁革熟於敵硝之木刀羶
磬羃於積膩之覆袂肉鬻喙於中刳之腐槽羣山一縞
而忍厚膚於湮泉填窟之委積萬籟一噫而壅酸鼻於
達暝違昕之怒號沙葱可以蕩氛驚天十萬里俱忘竺
嶺之鋤剗澤蒜可以却穢龍方三十首不必巴江之燼
炮末地椒而為太羹之和恣紛紜蠅翅之染指擷野韭
而為異味之助任逼迤魑腸之獻嘲縑糊綾藥而侈銅
熏紫赤之麤豔楮鏤卮染而銜綺錯鉛丹之蠟苞嗚呼

汰嗇異達隘舒殊室著焦蒿顓啼憤枯於一鼠之割割
珂華珮璨歌促踏於壘駒之滋息憶蔡姬十八拍是增
世間兒女子之悲恨望松樹十八公何羨天下宰輔魁
之屹植甫炭密之館轟軒幸潰灤之郭未及吾尚尤二
九榦之蟠根猶更隔尺五天之一壁也九月垂盡客還
應昌一再老公徘徊徜徉循十日之故步驚九迴之痛
腸灘乾磧枯風仆雪僵凍頰銛利瘡肌刺芒項自倔强
器彌昂藏又如狐趙諸人皆足以相國其徼福於歲寒

之後殊未免相從於艱難險阻之疆豈比夫平原十九人之碌碌亦復闕然不能自滿於吾今日十八公之堂堂也爾其鵲巢以為宅黿穴以為家湏洞碑轟泓坳谿矻傾輩流於往昔絕儷匹於幽遐空載籍之聞見慰睫眉之咄嗟梁之則明堂榱桷撐之則太極常娑棟之則林光崛竒柱之則溫室高華甘棄遺於度外頻契闊於天涯徒聞不稽之誕譎無證之竒褻揮斥日月擠排煙霞東並海而如瓜米擲地而成砂朔三度而偷桃騫萬

里而浮槎鱗方仙之騎竹葩瑞佛之杯茶年運而往物
深而佳獨是公之傲睨宛若士之脩姱揖德雲於妙峯
拜老子於流沙蓋於吾其臭味兼不知其疵瑕心轉老
而轉親歲飽歷而飽涉儘海榴之燠燕從宛杏之媒蝶
貫四時而青青肯一餉其熠熠善乎諸葛孔明之言曰
溫不增華寒不改葉夫然故受任乎艱危成功於蹉跎
寧一利而一鈍遽乍涼而乍熱鐵石可裂意氣不折苟
時情之好乖忍中道而永訣償遠遊之願望探造物之

奇絕縱四世而五公難對峙而並列請從此而歆盟要
誓言於生別他日十八公惠然入夢於海粟道人曰吾
居龍鍾之鄉蠖蟲之濱其寢糴歠而飯麋腐也不自知
其幾絳縣老人甲子之旬矣微夫子之發吾覆也吾猶
夫天難失旦於若木之不得晨也雖然有一於此孤棘
抵壁門槐吐茵金貂效顰芻狗厭陳吾安能從四表八
荒之外旅進咸陽之市以自鬻其希世之珍乎海粟道
人久忘形於寤寐猶劇口其嶙峋既見既覲不淄不磷

悵班荆之夷猶浩蟠木之輪囷夫事不身履目見而臆
決其是非物不心計智較而懸斷其無因持頃刻之薺
榮嗤八千之大椿殆典論之火浣將改評於謬詢吾方
少女其桑此君其筠六荷郎之屏腴千橘奴其食貧稍
五柳其倦軀盆九蒲其仙身吾尚友古人於不爭春風
之頂顙又孰與十八公之為靈乎哉吾於是號九垓叫
大鈞河捲嶽迴川吟谷呻噓暝壑於久灰吹綠波於既
塵繪精靈於蟄堦借雨露於通津捋怒鬚於晝虎晞衝

髮於朝麟西轡瓜涼南颿甌閩北毳狼胥之顏東筏駟
望之濬儻有物之或雙化予尻以為輪孰忖孰量孰喜
孰嗔長或續之或者認以為有餘之鳧脰短或截之或
者又以為不足之猩脣公乎公乎其幸而十八公也吾
願其半雲臺三十六之席其不幸而忘其兩公也吾不
願其垂太和十六子之紳有崛其芽膏完澤勻挺膚寸
於燮餘賴不摧而為薪即赦斤而生息終聳壑之逡巡
悲二仲之求羊戚九方之皋歎年顏共賒道揆適均五

侯却而莫前四輔擯而難賓弊穹壤而無儔極舟車而靡鄰觸磕地維簸揚天民恣肆矍鑠婆娑欠伸咄經邦經國之遠臣奚主林主樹之能神擊壤老人之經世曰生一一之物所以當兆兆之物生一一之人所以當兆兆之人允聖世之瑰材儼熙朝之選掄表后王之嘉植扶光景而常新匪弔古而為文盡按圖而寫真如今模索當世並樅檜栝柏而馳之俱未若髯之逸羣絕倫也

雙松賦

明王鏊

鬱雙松之並峙兮一不知其封殖之歲年
榦輪囷而磊砢兮文章錯而斑斕
蒼蚪拏空以騰上兮驚螭躍地以
屈蟠萬木凌冬而僵死兮獨青青其不刊似端人義士
之立朝兮正色儼然曾不可乎犯干彼幽人之何知兮
日坐對而盤桓朝予儀其挺直兮夕予挹其清寒固非
藍田之棄丞兮抑豈華陽之真官願千秋以相保兮歷
冰霜於歲殘使明堂大厦之棄遺兮非予心之所患

松柏賦

晉
左九嬪

何奇樹之英蔚託峻岳之嵯峨被玄澗之逶迤帶綠水
之素波布秀葉之蔥蒨列疎實之離離馥幽藹而永馨
紛燦燁以披離赤松遊其下而得道文賓餐其實而長
生詩人歌其榮蔚齊南山以永寧

松柏有心賦

以君子得禮歲
寒不變為韻

唐

上官遜

觀卉木之庶類而松柏之異羣貫四時而不改柯易葉
挺千尺而恒冒雪凌雲抗高標於物外遠卑冗於代紛
其幹則直其理則文驗受命於方地信無奇於此君於

是載離風霜多歷年紀持本性而常茂抱幽貞而獨美
太華之上森森映仙堂之峯台嶺之傍落落蔭靈溪之
水經冬不改憐江南之竹箭乘春暫榮笑東園之桃李
故見稱於前聖喻德於君子夫其勁節可佳明心不忒
實繁衆類生我邦國故將枝葉無隔於心源豈同橘柚
有限於南北錯萬物以為佐求其族而始得是以後凋
之義久不刊於魯經有心之言永昭著於戴禮吉士遠
託或亭亭於嶺上山苗乍淩時鬱鬱於澗底雖彼此殊

軌而榮華一體若乃背徂年當芳歲林煙乍卷秋雨時
霽仙侶或遊隱淪常憩莫不對偃蓋以瀟灑仰仙雲而
搖曳暢方外之遐遊滌樊籠之流滯若乃幽澗之側高
岫之端葉離離而日來冬暖枝梢梢而風至夏寒不以
無人而不秀又同美乎芳蘭至若大厦方構長材是求
詣藪澤訪陵丘遠近必度大小所謀有斯木之特達惟
工倕而擇不重曰歲聿云暮兮何木不變惟松柏兮凌
霜葱蒨儻有心之可嘉期君子之一眄

道觀內柏樹賦

有序

唐魏徵

玄壇內有柏樹焉封植營護幾乎二紀枝幹扶疎不過數尺籠於衆草之中覆乎叢棘之下雖磊落節目不改本性然而翳薈蒙籠莫能自申達也惜其不生高峯臨絕壑籠日月帶雲霞而與夫擁腫之徒雜糅茲地此宣所謂方以類聚物以羣分者哉有感於懷喟然而賦其詞曰

覽大鈞之播化察草木之殊類雨露清而並榮霜雪茫

而俱悴唯九丸之庭柏稟自然而醇粹涉青陽不增其
華歷玄英不減其翠原斯木之攸挺植新甫之高岑干
霄漢以上秀絕無地而下臨籠日月以散彩俯雲霞而
結陰邁千祀而逾茂秉四時而一心靈根再徙茲庭爰
植高節未彰貞心誰識既雜沓乎衆草又蕪沒乎叢棘
匪王孫之見知志耿介其何極若乃春風起於蘋末美
景麗乎中園水含苔於曲浦草鋪露於平原成蹊花亂
幽谷鶯喧徒耿然而自撫謝桃李而無言至於日窮於

紀歲云暮止飄蓬亂驚愁雲疊起冰凝無際雪飛千里
顧衆類之颯然鬱亭亭而孤峙貴不移於本性方有儷
於君子聊染翰以寄懷庶無虧於善始

四柏賦

有序

宋 鄒浩

廣陵學官廳嘗為夫子廟今所居之堂即其殿也庭植
四柏皆凜凜合抱愛之而賦云

瞻廣陵之寂歷兮直高堂之崢嶸薤蔓草以如拭兮偉
四柏之亭亭葉委蓋以固覆兮榦聳岸而上生根盤薄

而石老兮皮皴皸以龍驚儼相揖以成列兮何意氣之
不可陵豈商山逸叟見邀於子房兮將以翼儲君而經
營抑康廬勝友自得於蓮社兮方且傲當世而潔清想
昔日之巍然廣殿兮對先聖以交榮如子路冉有公西
華之侍坐兮垂紳端拱各抒其素志之誠嗚呼余德至
陋繆膺教職獲與柏而相值如親炙夫盛德講習之餘
將迎之隙既弗嗜於杯盤又兼忘於射奕必往來柏陰
吟哦其側綿日月以居多豁聰明而有得其朝暮也藹

瑞露以冥冥駐歸雲而凝碧其四時也謝羣芳之爭妍
憩薰風而暑釋節蟾光之十分封雪霜而玉皦若乃瓊
花兮一本芍藥兮十畦蕙蘭馥郁乎亭檻錦綺焜煌乎
塗泥上由刺史爰逮黔黎咸擇地而置酒紛踵繼以車
馳曾比柏之不顧兮其青青固自若也豈以此自少而
遂衰及夫時運遄往木帝無為驟雨滂沱以滌蕩狂飈
奔騰而折摧昔蕃鮮兮何在今寂寞兮空枝使當年之
好事慘搔首以興悲獨此柏之不變兮其青青固自若

也亦豈以此自多而增奇嗚呼柏之所以為柏兮其常德若茲僕幸得之而深兮勝老馬以為師允蹈賢聖所期於學者死而後已兮肯以窮達異其毫釐庶幾無愧乎柏之常德兮不為君子之棄而小人之歸

柳柏賦

有序

唐李德裕

夫受天地之正氣者惟松柏而已故聖人稱其有心美其後凋豈無他木莫可儔匹余常歎柏之為物貞若其餘而華滋不足徒植於精舍列於幽庭不得處園池之

中與松竹相映獨此郡有柳柏風姿濯濯宛若萸楊而
冒霜停雪四時不改斯得謂之具美矣惜其生於遐遠
人罕知之偶為此賦以貽親友

惟天地之生物均覆載而不私雖草木之殊性皆榮落
之有時感松柏兮自得經隆冬兮乃知常集霰於窮節
秉心終而不移觀夫竹嬋娟以挺秀松英茂以含滋可
蔭蔚於臺榭故封植於園池嗟綠柏之貞苦爰自託乎
幽岕或森森於寒壑或蕭蕭於神祠何炎微之僻陋或

珍木而在茲齊芊蔚於蘭苔儷真芳於桂枝遠而象之
聳幹參差凝翠旌之陸離迫而翫之布葉低垂若孔蓋
之葳蕤又似翠列巢以羣棲鸞奮翼而來儀含輕煙於
夕景泣零露於朝曦逮秋實之蕃衍綴青珠以纍纍嗟
乎材不可備人亦如此斯子張之容雖盛柳惠之貞則
虧有長孺之正色無思曼之風姿歎此物之具美以幽
深而見遺非企瑤林於塵外方玉樹於前墀望舊國兮
無際思故人兮未期曾不得倚樹而泛瑤瑟攀條而獻

蘭卮慨路遠而莫致抑毫端而孔悲顧謂稚子起為謠
曰楚山側兮湘水源美斯柏兮託幽根條總翠兮冬轉
茂實垂珠兮秋始蕃彼變化兮不測焉知非張緒之精
魂

御定歷代賦彙卷一百十五

欽定四庫全書

御定歷代賦彙卷一百十六

草木

桐賦

宋
袁淑

越衆木之薰徇勝雜樹之藻縟信爽幹以弱枝實裏素而表綠若乃根萑條茂跡曠心沖貞觀於曾山之陽抽景於少澤之東被籍兮煙霞懷珮兮星虹儀丹丘之瑞羽棲清都之仙宮

梧桐賦

齊蕭子良

植椅桐於廣囿嗟儵忽而成林依層楹而吐秀臨平臺而結陰乃抽葉而露始亦結實於星沈聳輕條而麗景涵清風而散音發雅詠於攸昔流素賞之在今必鸞鳳而後集何燕雀之能臨匪伊楚宮側豈獨嶧山岑邈蒿萊之難儷永配道於仙琴

桐樹賦應竟陵王教

梁王融

梧桐生矣於邱岫之曾隈儀龍門而插榦佇鳳羽以抽

枝蹤楚宮而留稱藉溜館以飜聲直不繩而特秀圓匪
規而天成同歲草以萎暮共辰物而滋榮豈遠心以自
外寧有志於孤貞

桐賦

梁
沈約

龍門之桐遠望青蔥專巖擅嶺或孤或叢枝封暮雪葉
映晝虹抗蘭橈以栖龍拂雕牕而溥露喧密葉於鳳晨
宿高枝於鸞暮合影陽崖標峰東陸俯結玄陰仰成翠
屋乍髣髴於行雨時徘徊於丹轂遶齊綵於碧林豈慙

光於若木

尚書省梧桐賦

以託根得地藏
器待時為韻

唐

崔鎮

惟皇立極建都河洛會府疏庭珍木咸若偉梧桐之嘉
遇竟因人以勝託傾鳳翼於朝陽偶鵷行於秘閣貴有
常尊靜為躁君花繁翼子榦直謀孫履素至潔體柔常
存揭日月以曜穎含雨露以流根豈與夫龍門半死嶧
陽孤植齊萬籟而混吹合千巖以共色勁質冰摧而杼
人莫識高標風折為樵人所得求知音於爨爨論分理

於繩墨且問之以死生又焉議夫通塞故至人以全身
遠害君子以自強不息失其理山林不足以攝生順其
道朝市何妨乎育德梧桐生矣自遠而至輕去無何之
鄉不居有過之地謂繁華兮國人服媚吾獨後春而翠
謂搖落兮物情共棄吾亦先秋以悴不改節以邀利不
立名而自異必居常以待終將百慮而一致大年椿榦
捐雲豫章箇簞貞勁桂椒信芳百果甲拆於金谷千林
花發於河陽實繁者皆圻材用者先亡我異於是于何

不臧布清陰於仙署棲白雲於帝鄉旁連杞梓俯接琳瑯蔚金蟬之氣色耀錦帳之輝光我封我樹無臭無香後天年於社櫟用當代於甘棠得喪齊致語默兩忘吾不知夫支離之德何獨攘而自出蘧瑗之智何獨卷而自藏復有翦刻為圭琢磨成器龍章鳳軫金符玉瑞平君子之心戒王者之戲晉侯得之諸侯麋至子野得之玄鶴來暨雖信美於疇日未若茲辰之佩仁履義我求懿德於是乎在疏相比遠相待以其彙征成而不宰譬

諸草木生植有時除惡務本樹善務滋引之斯至權之
斯離角弓兮有什杖杜兮陳詩敢告在位如何不思念
茲在茲庶事順施苟求夏陰與秋實無拔楊以樹茨

槐賦

有序

魏文帝

文昌殿中槐樹盛暑之時余數遊其下美而賦之王粲
直登賢門小閣外亦有槐樹乃就使賦曰

有大邦之美樹惟令質之可佳託靈根於豐壤被日月
之光華周長廊而開趾夾通門而駢羅承文昌之邃宇

望迎風之曲阿脩榦紛其璫錯綠葉萋而重陰上幽藹
而雲覆下並立而擢心伊暮春之既替即首夏之初期
鴻鴈遊而送節凱風翔而迎時天清和而溫潤氣恬澹
以安治違隆暑而適體誰謂此之不怕

槐賦

魏

曹植

羨良木之華麗爰獲貴於至尊馮文昌之華殿森列峙
乎端門觀朱櫟以振條據文陛而結根暢沈陰以溥覆
似明后之垂恩在季春以初茂踐朱夏而乃繁覆陽精

之炎景散流耀以增鮮

槐賦

魏
王粲

惟中唐之奇樹稟天然之淑姿超疇畝而登殖作階庭之華暉形禕禕以條暢色采采而鮮明豐茂葉之幽藹履中夏而敷榮既立本於殿省植根柢其弘深鳥願栖而投翼人望庇而披襟

槐賦

晉
摯虞

覽坤元之產植莫茲槐之為貴爰表庭而樹門膺論道

而正位爾乃觀其誕狀察其攸居豐融湛霽翁鬱扶疎
上拂華宇下臨脩渠湊以夷徑帶以通衢樂雙遊之黃
鵠嘉別摯之王睢春樓教農之鳥夏憩靈哺之鳥若夫
龍升南陸火集正陽恢茲鬱陶靜暑無方鼓柯命風振
葉致涼開明過於八閩兮重陰踰乎九房

大槐賦

有序

晉
庾 儵

余去許都將歸洛京舍於嵩岳之下而植斯樹焉遂作
賦曰

有殊世之奇樹生中岳之重阿承蒼昊之純氣吸后土
之柔嘉若夫赤松王喬馮夷之倫逍遙茂蔭濯纓其濱
望輕霞而增舉垂高暢之清塵若其含貞抱樸曠世所
希降夏后之卑室作唐虞之茅茨潔昭儉以矯奢成三
王之懋資故能著英聲於來世超羣侶而垂暉仰瞻重
榦俯察其陰逸葉橫被流枝蕭森下覆靈沼上蔽高岑
孤鶻徘徊寡鶴悲吟清風時至惻愴傷心將騁軌以輕
運安久留而涕淫

庭椿賦

元 任士林

燕山之陽南冥之濱有大木焉其名曰椿蓋抗歲時而聳立揭造化之蹲蹲者與相彼奇亭夷庚掌平迺睠眄村薨椽列星維陋巷之蕭蕭兀幽人之柴扃有椿喬然闕乎中庭玄雲構其堂宇秀色結乎軒楹觀其崇根碩本挺柯稠葉蓊蓊焉蓊蓊焉青冥黯黯皮溜雨而胼胝榦拂霓而冗逖簞日月之氛陰控雪霜之飄颻千尋引而表端萬鳥棲而影接蓋根柢之擁腫性也豈不美乎

莊生之櫟枝葉之榮暢時也又何歆乎王氏之槐耶盼
老人之豫章訪歲寒之松柏或輪囷以為奇或偃蹇以
為傑孰與夫謝萬牛而崔嵬却匠石而鬱第者乎爾則
稚竹株連弱松肺附結緒根於地軸藉沫濡於雨露想
其簇榦幘幘列萬間之厦屋不足以喻宗條鱗輳雖千
社之枌榆又何足以同年而語耶於是天翊其貞地隆
其植寒暑節其涼溫鬼神呵其峻特醴泉夜注而人不
能挹以草木之滋卿雲晨覆而人不能衣以青黃朱綠

之絲人不足以扶持而終風不移人不足以悅懌而陽
春色怡此所以俯視君遷傲睨平仲而永為斯庭之瞻
依也耶彼尋常之喬梓亦何足以與乎斯

忘憂館柳賦

漢枚乘

忘憂之館垂條之木枝逶遲而含紫葉萋萋而吐綠出
入風雲去來羽族既上下而好音亦黃衣而絳足蜩蟬
厲響蜘蛛吐絲階草漠漠白日遲遲於嗟細柳流亂輕
絲君王淵穆其度御羣英而翫之小臣瞽瞍與此陳詞

於嗟樂兮於是罇盈縹玉之酒爵獻金漿之醪庶羞千
族盈滿六庖弱絲清管與風霜而共雕鎗鏗啾唧蕭條
寂寥雋人英髦列襟聯袍小臣莫效於鴻毛空銜鮮而
嗽醪雖復河清海竭終無增景於邊撩

柳賦

有序

魏文帝

昔建安五年上與袁紹戰於官渡時余始植斯柳自彼
迄今十有五載矣感物傷懷乃作斯賦曰

伊中域之偉木兮瑰姿妙其可珍稟靈祇之篤施兮與

造化乎相因四氣邁而代運兮去冬節而涉春彼庶卉
之未動兮固肇萌而先辰盛德遷而南移兮星鳥正而
司分應隆時而繁育兮揚翠葉之青純脩榦偃蹇以虹
指兮柔條阿那而虵伸上扶疎而施散兮下交錯而龍
鱗在余年之二七植斯柳乎中庭始圍寸而高尺今連
拱而九成嗟日月之逝邁忽疊疊以邁征昔周遊而處
此今倏忽而弗形感遺物而懷故俛惆悵以傷情於是
曜靈次乎鶉首兮景風扇而增暖豐弘陰而博覆兮躬

豈弟而弗倦駟馬望而傾蓋今行旅仰而迴瞻秉至德而不伐兮豈簡卑而擇賤含精靈而寄生兮保休體之豐衍惟尺斷而能植兮信永貞而可羨

柳賦

魏
王粲

昔我君之定武致天屈而徂征元子從而撫軍植嘉木於茲庭歷春秋以踰紀行復出於斯鄉覽茲樹之豐茂紛旖旎以脩長枝扶疎而覃布莖森梢以奮揚人情感於舊物心惆悵以增慮行游目而廣望觀城壘之故處

悟元正之話言信思難而存懼嘉甘棠之不伐畏取累
於此樹苟遠跡而退之豈駕馳而不屢

柳賦

魏
繁欽

有寄生之孤柳託余寢之南隅順肇陽以吐芽因春風
以揚敷交綠葉而重葩轉紛錯以扶疎鬱青青以暢茂
紛冉冉以陸離浸朝露之清泫暉華采之猗猗

楊柳賦

魏
應瑒

赴陽春之和節植纖柳以承涼攄豐節而廣布紛鬱勃

以敷陽三春脩其奄過景日赫其垂光振橫條而遠翳
迴雲蓋於中唐

柳賦

晉
傅玄

美允靈之鑠氣兮嘉木德之在春何茲柳之珍樹兮稟
二儀之清純受大角之禎祥兮生濛汜之遐濱叅剛柔
而定體兮應中和以屈伸長莖舒而增茂兮密葉布而
重陰夾通塗與廣庭兮環清沼而成林於是玄雲被岳
素景含暉泰液渥流朝露未晞是精靈之所鍾兮蔚鬱

鬱以依依居者觀而弭思兮行者樂而忘歸夫其結根
建本則固於泰山兼覆廣施則均於昊天雖尺斷而逾
滋兮配生生於自然無邦壤而不植兮象乾道之屢遷
紛猗靡以從風兮若將往而復旋若乃豐葩茂樹長枝
天天阿那四垂凱風振條同志來遊攜手逍遙

雙柳賦

晉
成公綏

宅京宇之西偏濱犢鼻之清渠啓橫門於大路臨九達
之通衢愍行旅之靡休樹雙柳於道隅彌年載而成陰

紛嬋媛而扶疎

西掖瑞柳賦

以應時呈祥聖德昭感為韻

唐

郭炯

乾坤至誠草木無情神靈乘化而致理枯朽效祥而發生當聖澤未沾故兀然枯瘁及天光迴照遂藹爾敷榮因萬物以咸遂與百祥而畢呈故得垂陰瑣闥之中固本鳳池之側始孤標而穎拔乍葦弱而條直長充西掖之佳翫迴奪東門之秀色芬敷自異永垂不朽之名變化無常用表好生之德懋其莢生漸蔚榦聳惟條拂瑞

景而增麗裒祥風而獨搖可以彰聖主之玄感可以見
昊天之孔昭舒卷以時陋梧桐之半死榮枯順理鄙松
柏之後彫且春布發生之慶秋行肅殺之令於天地而
不失其常在金木而各得其性衆皆畢出盡達我則向
日而哀衆皆黃落萎腓我則感時而盛不然何以知至
德之動天運神功而瑞聖者矣翠色牂牁異酒泉嘉柰
之祥輕陰澹澹同鄱郡枯梓之感煙銷雨霽霏素雪於
宸居日晏春深雜繁花於睿覽青翠歲蕤垂軒拂墀在

日月偏臨之處當鴛鴦集苑之時至矣哉天降靈貺聖
為明證既得地而不離衆流常託根而獨標美稱是知
天聽自人而應者也

西掖瑞柳賦

以應時呈祥聖
德昭感為韻

唐
陳 誨

柳美西掖瑞彰聖時感巡遊之未至失榮落於先期雨
露所均常比中園之鬱鬱宮闈暫閉若無春日之遲遲
所以望車塵之行幸慰都人之怨思物或有憑神固難
宰生植不易地而殊榮孤影忽同秋而異色豈上天之

降鑒俾下民之是則於以激忠臣之心於以彰大君之德初斯柳之失常人未知其為祥秦原之煙景明媚漢苑之草樹芬芳獨孤彫而槁瘁似永隔於風光無絮花之似雪意膏露之凝霜及夫天迴舊步木得其性千官捧日以輸忠萬騎從龍而翊聖彼衆芳之已歇我得秋而始盛豈固異於常材實願貞乎景命偉夫瑞發匪遙成天意之孔昭德惟可覽結人心之幽感不然柳且無情曷枯而生其枯也當煙塵之晦其生也表氛沴之清

與時不偶叶聖斯呈政或可持疾風始知夫草勁節無
所立歲寒徒稱乎柏貞宜其俯鳳池而灑潤接雞樹以
連榮儒有因物比興屬詞揣稱聞瑞柳於春宮遂揄揚
於天應

柳賦

明
徐世溥

溪頭柳發江上春歸有美一人傷心緒絲閒行煙暮折
而賦之竊聞園中鬱鬱漢南依依章臺綠早薊北青遲
白門則啼烏爭宿灞陵則班馬常嘶勞勞亭畔若耶水

西所以笛聲恨別瑟調傷離至如託根墀側移植殿頭
翠袍夾乎馳道青瑣垂乎邦溝深宮長樂別館忘憂吳
娃恒歎梁王每遊發枚乘之麗藻憶張緒之風流斯則
柳之榮遇也爾迺淵明荒宅叔夜山庭先生表姓中散
匿名暗度杖履之跡遙聞鍛瑟之聲斯則柳之高隱也
及夫軍屯細柳衛宿長楊旌旂十萬羽獵輝光但識亞
夫詎問劉郎叛兒以白花遁禍季跖以柳下稱強斯則
柳之武俠也若乃深藏朱戶淺映清池垂露光濕挂月

星稀暮春修禊枝滿門楣蟬抱柱而不脫魚驚緡而不
移樓上之素手遙出當壚之秀肩近齊弱舞楚國之腰
彎畫秦宮之眉隨風暫舉向人復低遂使情鐘美人心
悲蕩子夢繞大堤魂搖江沚嫋暮煙兮千條漾春光於
萬里不比拙於松柏詎爭妍乎桃李哉

柳花賦

晉
伍輯之

步江皋兮騁望感春柳之依依垂柯葉而雲布揚零花
而雪飛或風迴而遊薄或霧亂而颺零野淨穢而同降

物均色而齊明

楊花賦

宋 田 錫

梁苑殘春垂楊映津枝黛染以交引葉眉纖而鬬伸落
絮如雪飄煙拂塵輕芳兮就月為魄澹白兮依風作神
當豔陽之美景過上巳之良辰其繁也六出之英未多
其豔也早梅之芳若何釋葉辭蒂流枝逗柯浮朝靄兮
散斜陽九重丹禁拂扁舟兮隨兩槳千里輕波是時孝
王多暇閑登水榭因悅柳之太柔賞茲花兮似畫乃顧

鄒枚憐其逸才命臨流兮就景陳綺席之金罍相如後
至居於座右欣麗藻之無敵若陽春之寡和衆賓目動
怯勝氣以潛消梁孝意怡禮竒才兮敢惰於是授以毫
牋言容懌然曰寡人多幸知子之賢願以文為樂也俟
當場而試焉且昔楊柳之詩古人有之楊花之賦作者
多非可以運精研之恩施絕妙之詞相如感主人之遇
援毫而賦盡華藻之菁英得飛花之態度以為漠漠霏
霏微風暖吹衰甘露於珠樹蕩朝陽於玉墀乍若吳王

江國水殿春曦梅花已老零落交飛矧又蕩然無羈紛
兮交錯入殘月之綺窻滿夕陽之畫閣乍如陳后失恩
長門寂寞梨花向晚繽紛散落有時金屋徘徊珠簾半
開罨繡牀之彩縷縈粉奩於玉臺乍若謝家深院寒景
相催暮雲方密飄飄四來至於湘浦幽深檉林葱蒨滿
黃陵之古廟撲蒼山之晚殿乍如亂煙之下落泉飛練
噴嵐洒煙沫花相濺有時送客南遊垂楊渡頭未盡離
酒猶縻去舟思夕宿之江館望朝雲之水樓飄兮蕩白

紫觴惹愁和鷓鴣以連飛平波渺渺伴舳舻而已遠晚
景悠悠矧夫春院深嚴書帷闌寂橫南窗之綠綺委羣
書於緗帙冰濡相浥粘匣硯以難飛風聚成規滾砌莎
而可惜加之碧簾銀牀梧桐影涼春光餘幾豔景方長
當奕客以凝情飛來寶局值嘉賓之舉白吹過金觴有
時簾幕雨餘池塘風定凝去忽飛幽而可詠榆墜莢以
相先桃落花而互映餘態重重妍姿弗窮大約含愁於
夕靄惟憐委迹於流風值輕露以多掩傍微陽而即通

是知有以妖冶輕盈為貴者雖五彩之毫妍不可寫雖
數子之詞才難騁奇惟相如之善者致梁王之悅而乃
命左史記言而右史錄之藏之寶笥以為柳花之詞

枯楊生稊賦

以青春光
耀為韻

唐敬括

柔得乎剛則變化無方故能令老者以安分使衰者而
再芳不然爰之均奚獨殊其棟撓木之衆奚獨舉其枯
楊徒觀其枝葉滋潤色帶韶光發枯槁擢豪芒直幹森
梢歛浮於青翠高柯偃蹇漸變於蒼黃豈比夫顛木貴

枿瓌材稱良而已哉至如和風稍吹遲日久照淡清煙
而羃歷合晚靄而凝耀苟非懷蠹狀雖死而猶生忽應
鳴禽類先號而後笑是知心動於內氣變於形以類相
感因時則冥或叢生落落或孤峙亭亭映平林而迴秀
倚長空而半青爰有翰林墨客憇此惟新覩物生興與
時為春在陽當榮於枯木理代實資於哲人遂稽大道
將期小伸相長楊以體物希百中於茲辰

國子丞廳連理樹賦

唐
王履貞

靈臺崇崇兮洞轆轤以繇延中有珍木兮鬱森森以芊芊始殊形以分聳終共理而連拳始信德以被物初應聖而效焉且學為教原丞為糾局生於學者表王化之大同植於廳者知官政而無曲亦所以據於德而遠於俗也樂我皇道彰我聖年謂為交柯乃尋本而無末謂為別幹能已離而復連依君仁義之圃對君翰墨之筵俾為我師者如斯木之一德為我曹者如斯木之相全故瑞不虛然從化而止化不在遠行之由已有善必應

詎云草木之無知惟德是親奚問陰陽之至理可以載
美青史可以表慶皇家人各有心我則合而為一物曲
有利我則不避其斜夫如是則造化之理易尋天地之
情可測順之則生瑞逆之則成慝故曰禍淫洵福正直
諒物情之效祥由人君之布德故得托根講肄之宇垂
陰夫子之牆雜庭槐以為列偶仙杏而成行逢聖而生
匪由乎日月以翼取端為寶孰尚夫金玉其相所謂光
乎泰階允臻靈貺不然者則徒聞其說孰究其狀至矣

哉觀一樹之攸同知四夷之內向

連理樹賦

唐陳諷

惟薰風之生物有穠李之表禎合連枝於異榦符一姓
於嘉名交影齊密均和共榮諒全德之通感豈元和之
曲成族堅附離訝生植之異氣殊質合體識天地之幽
清考彼祥經珍茲善價昭一人之有慶表四夷之嚮化
體符通理黃中之象攸存義用成蹊不言之道斯備蓋
夫靈根得地聳質齊芳分條表異合榦呈祥膚含玉潤

文蔚龍章雲交翼比影附枝強庇本根於仙族挺孤秀
於仁鄉始則分形謂陰陽之偶數終而一貫表遐邇之
通方是知玄本靈種暗符神用諒剪伐之為重合拱連
條允孚歌謠固耳目之所昭並甘棠而價掩比叢桂之
香遙則知瑞以感生祥由仁致覩政分而脉會契人事
與天意將德茂而精通故駢疎而合異於以昭化警俗
示人不二豈比夫草生堯砌空有紀於歷官芝產漢宮
徒用彰於祀事洎夫玄律發春東風薦臻齊敷連萼之

影共沐陽和之津想雙枝於棠棣感合體於君臣四海
為家豈必移根於上苑五色敬用固亦發瑞於仁人彼
晉得華林漢生廣殿諒崇功而間出豈謙德而來見願
棲託之見容恐光陰之不薦

李樹連理賦

有序

唐潘炎

帝在上黨延唐寺有李樹連理上親視焉賦曰

惟彼嘉樹列星之精耀本扶疎當元光之降誕盤根連
理應我后之文明天之發祥豈無他木必曰茲樹是光

皇族所以並脩榦連高枝青房表異朱仲稱竒察以休
徵不假終軍之識同於樹德寧為簡主之知族茂宗榮
盤根合理花之發也霰每亂於青春實之繁兮珠更深
於寒水豈徒生於靈井植彼東園自感義以相待但成
蹊而不言此乃興聖主之符表天家之姓一人親覩六
合稱慶至若鍾山之寶玉井之仙或正冠而垂訓或投
贈以成篇比德於我彼何有焉臣炎作賦天子萬年

大榕賦

宋薛士隆

越甌而南嶺山東麓有七閩之會焉厥都維福福都中
閩城山塹水修遠孔直麗譙南指粵有喬木根乎此堂
青葱映帶經五門而之合江夾經途者凡十有五里其
為根也盤桓詰曲勢浮平陸隱丘陵幹坤軸如山如坻
崱岑蔽虧列岫竒峯幻然默為蜿蜒糾紛蛇蟠鹿奔卷
舒連蜷油如出雲樹無全株萬本同植縈連擁腫鑕堅
露隙儔引儔緣自陵空碧和氣鬱贅疣生衆醜備百怪
形岌如神山冬無落木蒼蒼九夏森其翠幄枝柯離散

橫從出奇翕如其合判如其離嗟如其往歛如其來夭
矯驪龍摩天切空雛翼雲垂扶搖下風輪囷無心隨之
有本孔綜根元誰分混沌軒然而大厦成蚴然而怪螭
怒駢爪紛拏轟其八柱飛鳥千羣而咸棲有所綢繆束
薪不堪以火盤根錯節而摧斤缺斧其圓也不中乎規
不成乎矩樵夫視而弗斫大匠行而弗顧以無堪而保
其天斯所以邇乎人而壽莫之數也若夫景升之牛主
人之鴈不善其鳴服箱孔屯以不才而烹者何哉蓋豐

肌而蠹夫人之芻豢也斯榕木則不然承天之施得生
於地不假乎人不離乎類不以直節為高不以孤生為
異凌寒而不改其操連理而不稱其瑞無庸而庸無尚
焉為其全虛愚之義也至於交柯旁薄分根合枝異生
同命縈繚相維倚天成蓋蔽野成帷迷雲而零雨不下
畏日而炎天改色邑人之依行人之得不才而才無似
焉斯其為大通之德也夫惟有大通之德全虛愚之義
守不才之位處無庸之地為物而物固莫之陵比人而

人適當其意其事也無施其生乃克遂是生乎通邑大都之間尚亦躡千齡而幾萬歲也走嘗聞諸西方之人曰尼俱律陀之木其子芥三之一及其成材蔭車將五百乘斯榕木者不幾於是乎今夫閩中之木榕為大其萌也微物莫之害有叢其芽蓊然天蓋走不知命之者誰耶庸以劣其形而不文其內無文於內將或容於外而以成其大

榕木賦

有序

宋
李綱

閩廣之間多榕木其材大而無用然枝葉扶疎庇蔭數畝清陰人實賴之故得不為斧斤之所翦伐蓋所謂無用之用也感而為之賦其辭曰

南有巨木其名曰榕下蟠據於厚地上盪摩於高穹雨露之所霑潤雷霆之所震聳日月之所照燭乾坤之所含容與衆木均夫何賦形稟氣之獨不同也爾其擢幹數條輪囷離奇結根植本拳曲擁腫口鼻百圍之竅穴龍蛇千尺而飛動仰視俯察何規矩繩墨之不中也高

明之麗非棟梁之資斲削之工非俎豆之奉以為舟楫
則速沈以為棺槨則速腐以為門戶則液以為楹柱則
蠹薪之弗焰無爨鼎之功燎之弗明無燭火之用蓋枵
然之散木徒萬牛之嗟重宜匠石之不顧同櫟社而見
夢然而脩枝翼布密葉雲濃芘結駟之千乘象青蓋之
童童夏日方永畏景馳空垂一方之美蔭來萬里之清
風靚如帷幄肅如房櫳為行人之所依歸咸休影乎其
中故能不天斧斤桔擊是免雖不材而無用乃用大而

效顯異文木之必折類甘棠之勿翦立乎無何有之鄉
配靈椿而獨遠不然則鴈以不鳴而烹漆以有用而割
犀象以齒角而斃樗櫟以惡木而伐處夫材與不材之
間殆未易議其優劣也

古楠賦

有序

宋宗澤

巴城之南山有寺曰南龕寺之外有大木曰楠其生甚
久唐刺史嚴武御史史俊皆有詩譔刻於巖腹嚴曰臨
溪插石盤老根史曰結根幽壑不知歲自時迄今又數

百年邦人謂之古楠宜矣僕到官之三月兩至巖下讀史嚴之清什感是楠之老於巖谷而可憐也因慨然操筆而賦之曰

楠之生兮層崖之中巔詢之人兮不知幾何年包堅根而下蟠兮貫頑石而澈沈淵竦脩榦以上凌兮並孤岑而參蒼天大枝崛起兮虎豹拏攫小枝回屈兮蛟螭蜿蜒黃葉敷陰白晝沈沈輪廣十畝蓋窮百尋衆鳥托宿鄧林非深諸卉仰芘荆雲非陰雨濯瑩兮一塵不染風

振響兮海潮同音露下兮鶴唳月明兮猿吟擅此清致
亘古迄今有客戾止惻然動中吁嗟斯木之異兮有不
遇之窮爾胡不生於泰山之側秦帝東封會風雨之是
避豈以五大夫之號而封松爾胡不生於周成之宮禁
林九重顧親賢之是戲豈以封國之瑞而翦桐爾胡不
生於分陝之域舍彼召公未必以甘棠之蔽芾流詠於
國風抑亦豈無工師之良識爾材之非常用之為棟梁
則足以建九重之明堂用之為舟楫則足以濟巨川之

汪洋用為宗廟社稷之器則足以叅鼎鼐交神明薦至
德之馨香夫何默默而甘老於窮山寂寞之鄉徘徊其
下恍若夢兮心駭而目眙蒼髯偉人瞋目視曰噫謂子
知我乃不吾知吾生於斯長於斯始於毫末至於十圍
雨露不吾遺霜雪不吾欺春兮秋兮吾不知代謝之有
期漢兮唐兮吾不知興亡之幾時柯葉顏色曾無改移
過者千百睥睨焉不以吾為樸樾輩待之斧斤之害亦
幸不罹吾受天地造化之恩孰有等夷子之不智而乃

我悲使子處此復將奚為吾非不知強自取藏器以待
時而動老當益壯自任以天下之重儻匠人斲而小之
能不浼然而悔痛乃所願比不材之樗同乎無所用若
曰不遇自有物主之非吾所能為姑亦付之一夢客聞
之釋然悟曰達矣夫斯言可書紳而詠誦

御定歷代賦彙卷一百十六